

## Herremättli-Clique 1985

---

Sujet:

# 150 Joor Muusetämpel

---

Es sait sich ain, wo Sachverschtand het:  
"Was hundertfufzig Johr Beschtand het  
und noonig zue fescht roschtig gyrt,  
das ghert nadyrlig wirdig gfyrt  
mit Lyt vom Daig und mit Beherde,  
mit Yflussryche und Gelehrte,  
mit Mafia und Wy - Verdinner,  
mit Kinschtler - und mit andre Schpinner".

Jetzt merggt dr letschti Psychiater:  
Aha, es goht ums Stadttheater,  
wo scho syt hundertfufzig Länz  
Theater macht - und Schnäggedänz,  
wo nit im Horst no Kunibert,  
nai: das, wo allne Birger ghert.  
Drum het me däm - y find's allright -  
au schliesslig "Stadttheater" gsait:

Wenn also sone Schuppe feschtet,  
sy Mafia mit Torte mäschtet,  
wo d'Birger (wo das finanziere)  
blooss derfe muff dur d'Schybe schtiere,  
(denn d'Tire sin zu däre Fyr  
firls Volgg verkläbt gsi mit Babbyr)  
in däm Fall isch's nit deplaziert,  
wenn d'Zytig kritisch reagiert.

Das, was sich "Stadttheater" schimpft,  
ghert nit de Clique, nit de Zimpft,  
es nährt sich vo dr Allgemainhait  
und dorum dunggts aim fascht e Gmainhait  
wo quasi Richtig Mafia schtinggt,  
dass me, wenn sone Feschthli winggt,  
blooss en "Elite" losst lo koo -  
und Gweehnligi mien dusse sctoh.

Dr Statkus Horst: isch das e Bebbi?  
Dr Schulze? Dr Torroia Seppi?  
Und d'Merkel Susann, 's Kühne Kläri?  
Verzell's im Käptn vo dr Fähri!  
Und doch sin am Theaterfescht  
die - dangg em Konto - Ehregescht  
und fyre bis zum Morge-Kater  
mit Wy und Roastbeef i h r Theater.

Mir hän zwor - dass me's nit vergisst -  
dr Dürrematt und Frisch vermisst,  
derfir findsch unter allne Frässer  
fascht numme Dögger und Profässer,  
Verwaltigsreet und au Inschpäcker,  
acht Bankier, zwelf Chemiedirägger,  
mit andre Worte: d'Hautevolee!  
(E Gweehnliche hätttsch niene gseh!)

S Theatervolgg ghert zue de Dumme.  
Do ka dr Stumm nit ganz verschtumme  
und schrybt - will me do schrybe muess -  
e Kommentar mit Hand und Fuess.  
Doch wehet. Däwäg kunnsch in d'Zange,  
trampsch in e Näscht vo Klapperschlange,  
wo mit Pamphlet und vyl Gezisch  
bewyst, wie giftig dass es isch.

Jetzt hän mir Deppe ändlig glert,  
wämm aigetlig 's Theater ghert,  
denn: redet ain emool Fraktur,  
denn reagiere d' "Bsitzer" suur,  
und wird das "Bsitzertum" beschritte,  
denn zellt das als "Verfall vo Sitte",  
als "Boshait" oder als "Verzeerig".  
Dr Bebbi danggt fir die Belehrig!

Quintessänz:  
Trampsch du der Katze auf den Schwanz,  
dann mault sie - oder stirbt fascht ganz!

---

Am Fasnachtszyschtig vo demorge am nyini bis  
znacht am elfi und am Mittwuchmorge vom  
nyini bis am elfi goht me in d'Muschtermäss  
an d'Ladärne-Ustellig.